

**Kalaallit Nunaanni pinerluuteqarsimasut singernermikkut nalunaarsuuteqarlutik angerlarsimaffimmi pineqaatissinneqarsinnaalernissaat anguniarlugu, Naalakkersuisut Jusititsministerimut attaveqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Doris Jakobsen aamma Kristian Jeremiassen, Siumut)

**Akissuteqaat**

(Ilaqutariinnermut Inatsisinillu Atuutitsinnermut Naalakkersuisuni ilaasortaq)

**Aappassaannera.**

Inatsiseqarnermut Ataatsimiititaliaq qujaffigerusuppara nunatsinni pineqaatissinneqarsimasut angerlarsimaffimmini nakkutigisaallutik elektronisk-imik singernermikkut ikkussiffigineqartalersinnaanerit pillugu suliassaq sukumiisumik peqqissaartumillu suliarisimammassuk.

Naalakkersuisut ataatsimiititaliaq isumaqatigivaat oqarmata, nunani allani misilittakkat pitsaasut ilisimaneqarnerat toqqammavigalugu pinerluuteqaqqinninnissamut ilaqutariillu ingerlaqatigiinnarsinnaanissaanut isuma, angerlarsimaffimmiiginnarluni ilumut eqqunneqartariaqarnerisooq misissuiffigiumammagu.

Naalakkersuisuttaaq isumaqatigivaat ataatsimiititaliaq isumaqarmat, angerlarsimaffimmiiginnartinneqarluni pineqaatissinneqarsinnaanissamut killilersuiffiginagu misissuiffigineqaqqittariaqartoq. Tassami naamanngimmat assersuutigissallugu danmarkimi singernikkut ikkusimatitsilluni peruserineqartoq kisiat toqqammavigineqarnissaa.

Taamatut oqaaseqarlunga Naalakkersuisut sinnerlugit oqariartuutigissavara, Inatsiseqarnermut Ataatsimiititalip allannguutissatut siunnersuutigisaa isumaqatigigatsigu tamannalu toqqammavigalugu Naalakkersuisut pisussaaffilerneqassasut danmarkimi Inatsiseqarnermut Ministeriaqarfik attaveqarfigissagaat, nunatsinni angerlarsimaffik qimanngikkaluarlugu pineqaatissinneqartalersinnaanerup eqqunneqarsinnaaneranu tunngasoq.

Taamatut oqaaseqarluta Naalakkersuisut tungaanniit ataatsimiititaliap inassuteqaatigisai akuerineqassasut inassuteqaatigissavarput.